

Xadicha ketdiyu ko'nglidan halovat ham ketdi. Uy bamisoli o'lik chiqqanday huvillaydi. Polvonning yuragi toriqdi - uyni tark etdi, boqqa olib tushadigan qiyalikdagi bobosidan qolgan yerto'lani o'ziga boshpana qildi. Odamlarning kulishini bilardi, ammo uydagi hamma narsa Xadichani esga soladi: ostonaga qadami tekkan, devorga yelkasi - chidab o'tirishi qiyin bo'ldi.

Yerto'la eski bo'lsa ham havosi quruq edi. Yeri naq metin - cho'kich tegsa, chaqin chiqadi. Qoratoyni ham ichkari olib kirdi.

Bechora it ochiqqa o'rgangan edi, yerto'laga ko'nikolmadi, uch-to'rt kecha uvlab chiqdi, lekin - yo'q, keyin-keyin egasining holiga tushundi chog'i, poygakka to'shalgan poxol ustida indamay yotadigan bo'ldi.

Yerto'la avvaliga sal vahimali ko'rindi. Shifti past, agar chiroq bo'lmasa, naq lahadning o'zginasi...

Asta-sekin yerto'laning go'rsimon ekaniga ham ko'nikdi. Yomg'irli bir tunda uyqusiz yotib, uzoq o'yladi, o'zining tirikligini o'yladi, yonida iti Qoratoyni borligini, Xadichaning ketganini... Bir o'zi ketsa go'rga edi, qizchani ham yetaklab ketdi. Shu tariqa, xayoli to'rt yashar qizchasi Chamanga og'di, qizim hozir Sho'rquduqning ko'chasida bemalol o'ynab yurgandir, deb o'yladi, hatto uning qo'lchalarini tuproqqa belab qichqirayottanini eshitganday bo'ldi. Yarim tun ekani, tashqarida yomg'ir sharros quyayotgani - barisi bekor edi. Xo'rliki keldi, o'zidan xafa bo'ldi, keyin poygakda xumday boshini yerga qo'yib mudrayotgan itiga so'zlandi: mening holim shu, Qoratoyni, xotin ketdi, har kim o'z yo'lga ekan...

It otini eshitib, ko'zlarini ochdi: Polvon gapirib yotaverdi. Go'yoki bor alami tanidan hovurdek ko'tarilib, butun yerto'lani to'ldirayotganday edi. Qoratoyni egasining qarashiga chiday olmadi, poxol ustida g'ujanak bo'lib, yana ko'zlarini yumdi.

...Kunlar shu zaylda o'taverdi. Singlisi Adolat har kech sigir sog'ar mahali holidan xabar olib turardi. Akasining o'rligini bilar, shu sababli unga ko'pda aql bo'lavermas edi. Lekin, axiyri u ham chidab turolmadi.

- Mengayam oson tutmang, aka, - dedi. - Jo'jabirday jonman, qaysi birovlarimga qarayman? Odamlarga kulgi bo'ldik, aka, bu kuningizdan o'lganingiz behroq edi!..

Har safar singlisi kelganda miq etmay yotadigan odam, bu gal ilkis qo'zg'aldi:

- Men o'lsam tinchiysanmi, Adol?

- Qaytib oldim, aka, - dedi u. - Tillarim qirqilsin, aka, qaytib oldim!...

- Senga og'irim tushgani rost, - dedi Polvon. - Sal sabr qilgin, singil, men avval old-ortini bir o'ylab olay...

O'shandan beri Adolat qorasini ko'rsatmaydi. Olib kelgan narsasini ham yerto'ladan tashqariga, eski toltovoqning ostiga qo'yib ketadi.

Kunduzlari bir nav - yolg'izlik ko'p bilinmaydi. Ertalab qo'lga gavron olib cho'lga chiqib ketgani bilan to'shongacha podaga andarmon bo'lib yuradi. Baxtiga, sherigi Hasanboy kamgaproq odam, bir marta uylanib, yil o'tmay ajrashgan. Polvonning xotini ketib qolganiga ko'p ham ajablanmaydi.

Kunduzlari bir nav, jami azob shomdan keyin, ifti past yerto'laga qaytgan mahali boshlanadi.

Xadicha yoningda yotganida o'lim yodingga tushsa ham qo'rqmaysan: xotining bor, bolang bor, tepangda - xudo, e, bir gap bo'lar-da, deb o'ylaysan. Xadicha bo'lmasa qiyin ekan. Endi uning siyog'i ham esdan chiqqanday: bechora salga shamollardi, shamollab dimog'i chippa bitganida pishqirib bezor qilardi, huda-behuda chiroq yoqardi, ivirsib g'ashingga tegardi, lekin bari borligi durust edi - ovunardig, istagan paytingda qo'l uzatsang yetadi, g'ingshisa g'ingshir, iloji yo'q o'rtada non singan, nikoh o'qilgan; bag'ringga bosib yuzi ko'zidan muchchi olgan chog'laringda bechora kichrayib qolardi, u-ku kichkina, lekin sen ham o'zingni pardek yengil sezasan; dimog'ingda sutning hidi, qayoqqadir uchib ketgilaring keladi; doim ko'klam bo'lsa, ko'kalamzor bo'lsa, yalang oyoq, yalang bosh, pardek yengil Xadichani ko'tarib hovlidan chiqsang, keyin shu ko'targancha ketsang, hech kimdan uyalmasang, ketsang, yo'lingda birov uchramasa, ketsang-da, qayoqqa ketayotganingni o'zing ham bilmasang!

* * *

U xotini umrida bir marta - chimildiqda amallab ko'tarib olgan, xolos. Faqat, ba'zan poda ketidan yurganida xayoli og'ib, uni ana shunday ko'tarib chopmoqni istaganlarini eslaydi. Chimildiqda ikkita ayol etagidan bosib turgan, bittasi - Xadichaning o'rtancha ammasi, shunchaki etakdan bosmay, naq taqimiga qistirgan. Polvon unda yosh edi, birmuncha sho'xligi ham bor, kishibilmas timirskilani turib, Xadichani qo'ltig'idan shartta ko'tardi. Ammo g'aflatda qoldi, kapadek bo'lib ag'darilib tushdi. Uni rosa kulgi qilishdi. Xotin-xalaj baralla kuldi. "Mana senga, Oybuvi, mana senga kuyovning zo'ri", deyishdi. Zo'ru nozo'ri kimga kerak - shunchaki gap bo'lsa bas, hamma og'ziga kelganini aytadi, hammaning dimog'i chog'. Polvon chimildiq ortidan mast odamday gandraklab chikdi, chiqdiyu ko'chada sho'rquduqlik yigitlar bilan o'ralashib turgan jo'ralarini ko'rди. Kuyovning o'zi chiqqach, sho'rquduqlik bittasi battar avj qildi: "Senga Xatcha hayf, Polvon, - dedi. - O'zimizdan ortib qolgan yo'q edi, qulog'ini tishlab qo'yuvdik, haliyam tashlab ketaber!..." Polvonning yomon ajinasi tutdi, lekin urishgani jo'ralari qo'yishmadi, neki harbu zarb bo'lsa, o'zlarini balogardon qilishdi... So'ng, Sho'rquduqdan chiqar mahal, ko'chaning adog'ida, ular tushgan ulovga tosh yog'ildi. Polvon sal enkayib, kelinning boshida turdi, lekin Xadicha shusiz ham bexatar edi. Ust-boshi qalin, yumshoq - unga hech ziyon yetmadi. Birgina G'uchchi cholga tosh qattiqroq tegdi, bechora yilqichi, alami tutib, ovozinig boricha aytib qo'yabardi: "Nokas sho'rquduqlik, mening aybim nima? Chimildiqqa kirgan menmi?!" Uning baqirganiga birov parvo qilmadi. "Yor-yor-yoron-ey!" deb qo'shiq aytishdi. Uni Sho'rquduqdan qo'shilib chiqqan kelinning xeshlari boshladi. Galatepaliklar avvaliga iymanibroq turishdi, keyin ular ham qo'shildi, to' o'zlarining sarhadlariga yetguncha bo'kirib borishdi: "Tomda tovuq yotadi, yor-yor-yoron-ey, oyog'i sovqotadi yor-yor-yoron-ey!..." Yolg'iz Polvon qo'shiq aytmadi. Indamay keldi. G'alati edi. Yonida - Xadicha, hali yuzini tuzukroq ko'rolgani ham yo'q, uyatu qo'rvudan bir burda bo'lib o'tiribdi, ulov har silkinganda yelkasi tegadi, xuddi bir yashin urganday, o't, olov, qiyomatning naq o'zi!.. Keng bir dala, Yo'l, ulov... E, Xudo, ulov degani muncha imillamasa!.. Bir yoqda qo'shiq, bir yoqda G'uchchi chol, haliyam so'kinyapti: sho'rquduqlik nomard chiqdi, ko'chada ro'para bo'lolmadi, orqadan tosh otdi... Endi G'uchchiga qiyin, endi uning g'urrasini Galatepa rosa bir oy kulgi qiladi, ajab bo'пти, xo'b bo'пти, sen cholga kuyovnavkarlikni kim qo'yibdi; e, enalari o'lsin, nimasini eslaysan, Polvon, eslagulik joyi qoldimi! Yoningda Xadicha yotsa tuzuk, Polvon, hali bu ko'rganlaring oz, Polvon!..

* * *

Xadicha bir sidra kiyimini tugun qilib, poygakda qotib turdi, bechora biror sado chiqishini kutdi, lekin Polvon er bo'lib bir narsa demadi. Xadicha dahlizga chiqib yana birpas turdi, hovliga chiqib hovlida turdi, ilindi, qaytarib olar-ku, dedi, ammo Polvon teskari-to'ng bo'lib yotaverdi, so'ng, Xadicha darvozaga yetganda chidab turolmadi, qizchasi Chamanni qo'lidan sudrab chiqdi: "Ma, muniyam obket, pishirib yeysanmi, isqotingga qo'yananmi!..." Musht yeganda yig'lamagan ayol, buni eshitib yomon bo'shshdi, ko'ziga yosh oldi: "Hah, falak!- dedi. - Mayli, ketsam ketayin, beqadr bo'ldim, mayli, Xudodan toping". Shu gapni

aytdiyu qizini yetakladi-ketdi. Qancha yotganini bilmaydi, bir payt chiqib qarasa, Xadicha uzoqlabdi, Sho'rquduqning yo'lida qizini iyartib ketyapti. Polvon Toshgazagacha izma-iz bordi, lekin ularning qayrilmaganini ko'rib shartta to'xtadi, avvaliga g'azabi yo'q, ichi to'la alam, chakmonining bariga bir urdi: "Hay, mayli, ketsang ketaber, Xatcha, Sho'rquduq borasanmi, nariroqqa o'tib ketasanmi, bir boshimda bir kunim, men ham sensiz uloqib ketmasman!..."

Orqaga qaytdi. Hovlida o'tirib, zambilg'altakning bo'shagan tirsagini sozladi, chalg'ining tig'ini peshladi, o'zini yupatdi, hatto sal ovunganday ham bo'ldi, keyin, kech tushganda qarasa, taqron joyda toq o'zi o'tiribdi, dardlashgudek mahrami yo'q, yig'layin desa, ko'r bo'lgur ko'zga yosh kelmaydi. Notavonligini endi sezdi, alamidan xotin bechoraning uyda qolgan kiyim-kechagini hovliga olib chiqib oshpichoq bilan qiymaladi, kultepaga eltib ko'mdi. Yo'q, bu bilan hav tinchimadi, kultepaga o'zini eltib ko'msa ham tinchiguday emasdi. Bezovta, beorom, miyasiga qurt tushgan qo'chqordek hovlini gir aylanib yugurdi. Aylanaturib darvozaga ro'para bo'ldi-yu, uni lang ochiq ko'rdi. Ko'chaga chiqdi. Sho'rquduqqa yo'l tutmay, to'g'ri Salim saqichnikiga burildi. Borsa, Salim hovli o'rtasida sandal qo'yib, oldida mag'zava to'la tog'ora, bir parcha pishiq g'isht bilan tovonining yemini qirtishlab o'tiribdi. Polvon tog'orani bir tepib ag'dardi, so'ng Salimning yoqasidan oldi. O'rta Maxfirat tushmaganda oxiri yomon bo'lardi. Salim uning qo'lidan yulqinib uyga chopdi, zum o'tmay otasidan qolgan qo'shtig'ni ko'tarib chiqib, Polvonga o'qaldi: "Ket, bo'lmasam otaman!" Mahfirat miltiqqa ko'kragini tutdi: "Avval meni otasan!.." Polvon uni chetladi: "Qo'y, singlim, ering hazillashyapti". Yo'q, xotin aytganidan qolmadi, eridan miltiqni yulqib olib, hamsoyaning hovlisiga otdi. Polvon boshqa musht ko'tarmadi, g'azabini ichiga yutib, tashqari chiqdi. Hayal o'tmay, ortidan Salim saqich ham chiqib keldi, qachon yirtib ulgurgan bo'lsa ham, egnidagi kiyimning butuni yo'q, yenglariyu ishtonining baloqlarigacha ro'dapoday osilib yotibdi, boshidan tuproq sochganmi, aft-basharasining kulga yumalagan toyxardan farqi kam, chiqasolib Nizomboy milisaniy uyiga jo'nadi. Polvonning xayoli qochdi: bu nomard boshini yorishdan ham toymaydi! E, opketsa, opketar, nima, ortingda yig'lab qoladiganing bormi! Mayli, oxirigacha nomardlik qilaversin, Nizomboyga chaqadimi, boshqa qiladimi, mayli, shu nomardning ham xusuri qonsin!..

O'zi keyingi paytlar Salim saqich bilan oshnachilikni bas qilmoqchi edi. Bir-ikki bor atay so'kishgani chog'lanib bordi. "Zora so'kishib qolsagu ora ochilib, yuzko'rmas bo'p ketsak", deb o'yladi. Yo'q, so'kish ham oson emas ekan, odamning yuzidan o'tishi qiyin bo'ldi.

Ikki piyola aroq ichguncha har ne janjalga xezlanib o'tirdi. Keyin sal kayfi oshdi. Salim saqichga rahmi keldi. "Bu dayus sil, qon tuflab yurib, o'zini o'nglaguncha ozmuncha urindimi", deb o'yladi, qiynaldi.

Salim Kattaqo'rg'ondan murch, saqich, hushtak, hatto okak odam nomus qiladigan narsalargacha olib kelib otardi. Keyin ana shu attorlikdan tushgan sarmoya bilan boshqa bir ishni kasb qildi. Kechqurunlari, kishloqda ismi do'kon yopilgan mahal, so'rab kelganga bir so'm ustamasi bilan aroq sotadi. Hozir endi tuzuk bo'lib qolgani - yuziga qon yugurgan, yo'tali yo'q, gaplari ham dadil.

Oxirgi gal Salim saqich unga nasihat qilgan bo'ldi:

- Bu ishingni qo'y, bola, sen ko'p ichaverma.

Polvon uning nasihati astoydil ekaniga ishonmadi, kuldi. Salimning esa jahli chikdi.

- Men bir oti yomon odamman, Polvon ukam, - dedi u, - Eshitsang, o'zing uchun eshitasan, eshitmasang - otangning go'riga!..

- Gaping o'zi qiziq-da, Salim - deb e'tiroz qildi Polvon. - O'zing quyib berasan-u, ichmagin, deb aytganing nimasi? Keyin, oshna, Xudo bo'lsang ham, ota-buvamni o'rta qo'shma, tepada tinch yotsin, men hali o'zimdan qolganim yo'q.

- Holingga boqmaganing yomon, - deb kuldi Salim saqich. - O'zingcha ne xayollarga borib yuribsan! Aytib qo'yay, menga ko'p shox qilaverma, bo'lmasa, naq changingni chiqaraman! Sen bu yokda ichib yurasan, xotinchang Sho'rquduqqa bir oylab o'tlagani ketadi!..

Polvon Salimni jag'iga bir urib ko'rpachaga qulatdi. Lekin u taslim bo'lmadi, tishining orasidan sizayotgan qonni kafti bilan sidira turib, yana gapirdi:

- Sen bu yoqda, u naryokda... Enasinikida o'sma qo'yib o'tiribdi, deb o'ylaysanmi!..

- Bas qil!..

- Bo'pti, men bas qildim, lekin sen ham o'zingga ehtiyot bo'l, Polvon ukam! Kuchingni xotinga ham ko'rsatib tur!.. - Salim saqich pixillab kuldi.

Polvon tag'in musht ko'tardi, lekin urmadi, shartta joyidan turib jo'nadi. Yo'l bo'yi Xadichani o'yladi. Buzuq desa, buzuqligiga ishonmaydi, tuzuk desa, erta bahorda Sho'rquduqqa ketib, rosa ikki hafta o'sha yokda qolgani rost. "Sattorqulning xotini tug'ibdi", degan edi. Bunisini Polvonning o'zi ham bilardi. Sho'rquduqqa borganida bidillab qarshi oladigan tojik qiz - Sattorqulning xotini keyingi safar undan tortinibroq turgan edi. O'choqning boshidan beri kelmagan. O'zi oriqqina, shundan, qorni batgar do'shyib ko'ringan edi.

Uning-ku, bo'shangan rost, lekin Xadichaning o'sha yerda bunchalik qadalib qolganiga nima deysan?.

Uyga qaytib, xotinini burovga oldi. Xadicha qasam ichdi, qizini, enasini, Xudoning o'zini guvoh qildi. Lekin Polvon ishonmadi. Ishonay dedi-yu, ko'nglida tutun qolarini sezdi. Kayfi bor edi, chekayotgan azobi bol tuyuldi - xotiniga ishonmadi.

Bir kuni azonda podani cho'lga haydab ketaturib, Toshgazaning so'l betida qirg'iydek qo'qqayib o'tirgan Nazar Maxsumni ko'rdi. Hayron bo'ldi: Maxsum-ku o'zidan tinchigan odam, choshgohdan oldin qorasini ko'rsatmaydi - bugun bunday o'tiribdi? Qichqirib salom berdi. So'rashay desa - uzoq, salomini kifoya bilib, yana podaga andarmon bo'ldi, haydayverdi. Bir vaqt Nazar Maxsum kulrang toyxarida orqadan yetis keldi va yonma-yon ketaverdi.

- Nevaramning to'ypga bir kelasiz-da, Polvon boy, - dedi u. - O'zingiz kelib bir davra qursangiz Odam yuboraman.

- Ko'p qatori borarman, - dedi Polvon. - Lekin, Maxsum buva, o'zingiz bilasiz, men olishadigan polvon bo'lmasam, otamning qo'yib ketgan oti...

- Olishmasangiz ham bir keling, - dedi Nazar Maxsum. - Nevaramning to'yini bir ko'ring. Yaxshig yigit, boshqalarning bolasiga o'xshamaydi, asli palagi toza-da, Polvonboy. Usta Xoliyor vahima qilib yubordi, "Muningiz bir alpomish yigit, muni ko'rpachaga qanday ag'natamiz?", deydi...

- O'sarqulni bilamiz, Maxsum buva, - dedi Polvon. - Tuzuk bola.

- E, past ketdingiz, tilla-ku, tilla! - dedi Nazar Maxsum. - O'zingiz qalaysiz, Polvonboy? Xotiningiz ketibdi, deb eshitib edim, shu gaplar rostmi?

- Ertaga qirq kun bo'ladi, - dedi Polvon.

- Chillasi chiqarkan-da, - dedi Nazar Maxsum. - Bekor qipti, Polvonboy, sochi uzunlik qipti, endi sizday yigitni topolmaydi,

Taloq-palog'ini aytdingizmiB ?

- Ko'zim qiymayapti, Maxsum buva. Aytсамmi deymаn-u, qurg'ur ko'z qiymaydi.
- O'ychining o'yi bitgunchа tavakkalchining ishi bitadi, - dedi Nazar Maxsum. - Sho'rquduq boryapman, аgar talog'ini аytsangiz, men o'zim opketardim.
- Dabdurustdan bo'lmas, - deya mulohaza qildi Polvon. - Buning bir xil qoidalari bo'lardi, shunday аytib yuborgan bilan...
- Bo'laveradi, - dedi Nazar Maxsum. - Endi, o'ylab o'tirasizmi, Polvonboy, magarkim, yuzingizga oyoq qo'ydimi, endi o'ylash yo'q!
Bu o'zi bir chuvalgan savdo, talog'ini аytasizu shartta qirqasiz - davosi shu!
Polvon qanday "xo'p" deb yuborganini bilmay qoldi.
- Bitta "xo'p" bilan ish bitmaydi, - dedi Nazar Maxsum uning nodonligidan ranjib. - "Taloq qildim", deb аyting.
- Taloq... - dedi Polvon.
- Bo'lmaydi, qattiqroq, - dedi Nazar Maxsum. - Yana ikki marta аyting, qoidasi shu.
- Taloq, taloq!
Qahri qo'zib turgan edi, taloq аytib ham hovri bosilmadi. Alamidan orqaroqda borayotgan sigirning kuymichiga gavron bilan tushirdi, keyin birdan ko'zlari tindir, bo'shашdi, yolg'izoyoq yo'lning chetiga behol o'tirib qoldi...
Bir zamon qarasa, sigirlar yo'ldan chiqib, lalmi yo'ng'ichqaga oralab ketibdi. Nazar Maxsum ham olisda, xuddi yov quvganday ortga qarash yo'q, toyxarini qichib boryapti. Polvon bir kasofatni sezgandek bo'ldi, lalmi bedaga urib ketgan podani ham unutib, Nazar Maxsumning ortidan chopdi. Quvib yetib, yo'lini to'sdi:
- Kingа mo'ljal qilib boryapsiz, Maxsum buva?
- Mo'ljalim yo'q, Polvonboy, hech mo'ljalim yo'q, - deya Nazar Maxsum taysalladi, ko'zlarini olib qochdi. - O'rolni аytganday bo'lishuvdi, lekin men ko'nmadim, meniki bir savob...
- Savobingizning uyi kuysin, - dedi Polvon. - Vakolatimni qaytib bering!
- Ana, oling, Polvonboy, - dedi Nazar Maxsum aqli shoshibroq. - Ana, oling vakolatingizni, men bir savob ish, deb edim, mayli, o'zingiz borib аyting.
Mo'ljalni xato olgan ekansiz, - dedi Polvon. - Qo'yadigan xotinim yo'q!
- Xo'p, xo'p, Polvonboy, bizniki tig'iz emas, dedi Nazar Maxsum. - Lekin siz ham bir o'ylang, hozir mengа zug'um qilyapsiz, ertaga o'g'lim Sanaqudbek kelganda nima javob аytishingizniyam bir o'ylang.
- O'rolga Sananing xotinini obbering! - dedi Polvon. - Uyga qayting, Maxsum buva, Sho'rquduqqa keyinroq borasiz.
Nazar Maxsum itoat qildi - toyxarini orqaga burdi. Polvon bedaga oralagan sigirlarni bir amallab to'da qildi-yu, ovloq bir kamarga qamab, o'zi Sho'rquduqqa jo'nadi.
Darvoza ochiq edi. Har gal bemalol kirib boraveradigan odam, bugun taqillatgani ham jur'at qilmadi - turaverdi. Xayriyat, hovlida Xadichaning o'zi ko'rindi, аjablandi, qo'lidagi cho'ltoq supurgini tashlashni ham unutib tashqari chiqdi. Arazi tarqamagan chog'i: salom bermadi, xuddi begonaday, ko'zlari yerda, og'zini ro'mol bilan to'sdi... Polvon achchiqlanmadi, qaytagа - xo'rлиgи keldi, xotini o'ragan bir so'mlik gardi ro'molu uning kir unnagan ko'ylagi sabab bo'ldimi yoki qo'lidagi cho'ltoq supurgimi, ishqilib, unga betlab qaray olmadi, uyaldi, o'zini nomard, noinsof sezdi.
- Obketay deb keluvdim. Xatchа, - dedi sekin, ovozin о'zi ham tanimay.
- O'ldirib qo'yasan, - dedi Xadicha, - Men-ku, borarman, lekin sen tentak o'ldirib qo'yasan.
Shunday deb yig'ladi. Polvon unga jo'yaliroq gap topib berolmadi. "Rost, - deb o'yladi, - bu borsa, yana jinim qo'zib, yana so'ksam, ursam, xotin degan nar-saning nima holi bor, o'ldirib qo'yaman".
Xadicha ichkari kirib, Chamanni yetaklab chikdi. Qizcha qo'rqib qolgan ekan - otаgа qarab talpinmadi.
- O'lmasang, manavi norasida odam bo'lganda tushunarsan, topisharsan, - dedi xotin. - Meni o'z holimgа qo'y endi.
Polvon birdan sergaklandi: Xadicha xotin boshi bilan boyadan beri sensirayotgan ekan.
- Sensirama, Xatchа, - dedi u. - Toza tomiring suvga yetgan bo'lsayam sensiramay gapir!
Xadicha sho'rlik to'lib turgan ekanmi, battar ters keldi:
- Qo'lingdan kelganini qil! - Bu gapni аytishgа аytdi-yu, ortgа tislendi. Polvon angrayib turib qoldi.
- Sen u yokda odamgа o'xshab gapirarding, Xatchа, - yedi U bir vaqt o'ziga kelib. - Kimning darsini olding, negа unday gapirasаn?
Xadicha indamay yergа qaradi. Ukasi Sattorqul darvoza orqasigа kelib bekingan ekan, shartta otilib chikdi.
- Ket! - dedi u ko'kragini kerib. - Esing borida ket, bo'lmasа yomon qilaman!
Polvon uni taniyolmay qoldi. Yigitning kayfi buzuq, mo'ylovining uchlarigacha titrab turibdi, indamasang, uradigan shashti bor.
Polvon, bir ko'ngli, gardanigа solay, deb o'yladi, lekin shaytonga hay berdi: qo'y, baravar bo'lib o'tirma, bir kun tuz ichgats joygа qirq kun salom, qo'y, Polvon, o'zingni bos!
Orqasigа yurdi. Satgorqul izidan qolmadi.
- Ket! - deb baqirdi u tag'in. - Qaytib shu ko'chada qorangni ko'rsam, oyog'ingni urib sindiraman!
Polvon bo'g'ilibroq kuldi. O'zining ne alfozda ketayotganini o'yladi: yelkalari qisiq, qaddi bukik, bo'ynigа mugpt tusharini kutgandek. Uyat, uyat, ne kunlarga qo'yding, Xatchа? Sendan shuni kutib edimmi, Xatchа? Ko'rgan bиров nima deb o'ylaydi, enag'ar Xatchа?! Yer bilan bitta qilding-ku!..
Nomus zo'r chikdi, chidolmadi, taqqa to'xtadi. Sattorqul ham to'xtasa durust edi, ammo u to'g'ri bostirib keldi, musht ko'tardi, lekin ulgurmadi, o'zi zarbdan yergа ag'darilib tushdi. Polvon uni bilagidan dast ushlab, siltab turg'azib qo'ydi, lekin gap qotmadi, yo'lга ketaverdi.
Yegan mushti alam qilgan ekan. Sattorqul yarim yo'lda, adirdagi tuyaquduq yonida quvib yetdi. Yolg'iz emas, qavatida yana ikki otliq, biri - Ahmad shayton, unisi - yuqori labi kemtik, jikkakroq odam.
Etik qo'njigа qo'l yuborsa nomardlik bo'ladi, gavron ham poda qamalgan kamarda qolgan - bir o'zi uchovini daf etargа holi kelmadi. Bir nafasda qo'llarini orqasigа qayirib boylashdi, so'ng haligi labi kemtik yigit bexosdan taqimigа tepdi - Polvon chalqanchа qulab tushdi. O'rnidan turmoqchi bo'lib uringanida, Sattorqul kelib, yelkasidan etigi bilan bosdi:
- Xatchaning talog'ini аytasan! - dedi u. - keyin, mayli, tusagan yog'ingga ketaber. Aytasang - bo'shatamiz.
- Hozir bo'shat, - deya Polvon qaynisigа emas labi kemtik yigitgа yuzlandi. - Bo'shatib qo'yib gaplash.
Polvonning o'ziga bepisand qaragani Sattorqulга alam qildi:
- E, beshbattar bo'lmaysanmi!.. - Etigining uchi bilan Polvonni yuztuban ag'darib tashladi va yag'rini aralash qamchi tortdi. O'rmasi mayda ekan - badanni tig'dek kuydirib o'tdi.
Polvon iyagini zarang yergа tiragan ko'yi qotib yotaverdi. Avvaligа og'riqni sezib turdi, qamchi har tushganida eti ko'pchib-

This is not registered version of TotalDocConverter

qabari to'liq qaytganida birin, tekim o'lasda so'ng'eti o'lib, quloqlarida qamchining havoni vizillatib chizayotgan tovushigina qoldi.

Ishongisi kelmadi. Tinchgina molini haydab ketayotib edi, yo'lda Maxsum uchradi, taloqni olib ketmoqchi bo'ldi, uni iziga qaytarib, o'zi keldi, mana endi, manavi zarang yerda, tuyaquduq yonida, qo'llari bog'liq, qimir etgani imkoni yo'q, yer bilan bitta... Tush ko'ryapman, deb o'yladi u, hammasini tush ko'ryapman, seniyam tush ko'ryapman. Sattorqul inim, podachining tushi qursin, bir xil tushlarimda meni ilon chaqadi, tishi etigimdan o'tib boldirimga sanchiladi, dod deyman. Dodlaymanu uyg'onib ketaman, seniyam tush ko'ryapman, Sattorqul inim, yaxshi qilmading, inim, mayli, qattiqroq ur, toki men uyg'onib ketay... Yolg'izlik yomon, inim, sizlar uchov, men bir o'zimman... Sen ham harsillab qolding, charchading, inim, mayli, qamchini labi kemtik jo'rangga ber, u ham ursin, ayt, qattiqroq ursin, o'rmasi har sermab o'tganida yag'ri nimdan parcha-parcha et uzib olsinu men uyg'onib ketay, tushdan forig' bo'lay, yonimda Xatchani ko'ray, tushimda bo'lsayam uni uyga obketay, mayli, uraber, inim, yara-chaqa bo'lsa bitib ketar, to'xtama, nega to'xtading yoki menga rahming keldimi, inim?..

Chidab yotdi. Ingramadi. Bir mahal havo dim tortganini sezdi. Dim, epkinsiz, quyuq. Yelkasidan chiqqan ter ko'zyoshiday issiq... Termi bu, qon emasmi?.. Qip-qizil, ko'zyoshiday jizillatadi, sarg'ish chakmonni bag'ir tusiga bo'yab boryapti...

Ko'zlarini yirib oldinda bir juft toshovon etikni ko'rdi. Ag'darma ko'n, choklari pishiq, jiyirilgan joyi yo'q, faqat nag'ali yeyilibdi, qushning tiliday yupqa, bugun-erta uziladi...

Etiklar qimirladi. Polvon yotgan joyida bir-ikki silkinib tushdi. Keyin etiklar yana manglay tarafiga o'tdi. Polvon tag'in ularga tikildi, biroq etiklar tutqich bermadi, soniya sayin kichrayib, uzoqlashib boraverdi. Ko'zlarini yumarkan, chuqur tin oldi, iljaydi: etiklar qochdi, qochdi!..

... Sahar mahali kunbotar tarafda yilqi kishnadi. Sayxonlikdagi yantokdarni shitirlatib salqin shamol turdi. Polvon unga yuz tutdi - uzoq, to sal tetik tortgunicha. So'ng yilqi ovozi kelgan yoqqa qarab o'rmaladi.

Ko'p sudraldi. Tizzalari, tirsaklari zirapchaga to'ldi. Taqirga yetganida qurigan loy qisir-qisir sina boshladi. Bir payt barmoqlari balchiqqa tegdi. Chanqoq xuruj qildi: balchiqni siqimlab og'ziga solib shimidi. Suv chiqmadi hisob, tomog'iga tiqilib, nafasini qaytardi. Yana oldinga o'rmaladi. Biror besh daqiqa o'tib, uzatgan qo'li suvga tegdi. Polvon ikki-uch to'lg'onib olg'a jildiyu betini suvga botirdi, so'ng tirsaklariga tayanib, tili bilan yalashga tutindi. Ko'nglida g'alati bir g'urur uyg'ondi, o'zining miskinligidan, manavi qora balchiqqa belanib yotganidan, suvni kuchukka o'xshab shaloplatib ichayotganidan shodlandi, sovuq tomchilarning chanqoq vujudi bo'ylab bir maromda taralayotganiga quloq soldi...

Xadichani Sho'rquduqdan berida, poda yotar joyda topdi. Ustida o'sha kir ko'yilagi bilan gardi ro'moli, etagida qo'ng'iz kavlab ketgan besh-olti g'ovak tezak (shuni bahona qilib chiqqan), birov urganmi, o'zi yig'laganmi, ko'zlari qizargan...

Polvonni avvaliga tanimadi, yo'q, tanidi-yu, ko'zlariga ishonmadi, qo'rkdi, qo'li bilan yuzini pana qildi - qamchidan to'sganday.

- Talog'imni aytdingizmi? - deya sekin, xo'rlanib, kelar baloni daf etolmasligidan qo'rqqandek so'radi: ko'zlari mo'ltiradi, etagidagi tezak yerga to'kildi.

- Aytardim, Xatcha, - dedi Polvon. - Aytardim, lekin endi bo'lmaydi, ilojim yo'q, aytсам - qo'rqqoqa chiqaman. Chidaysan endi, Xatcha...

Xadicha yig'ladi. Ko'zlarini artarkan, ro'moli boshidan sirg'alib tushdi, sochlari yelkasiga yoyildi.

- Boraymi? - deb so'radi. - Urmaysizmi?..

Polvonning xo'rliqi keldi: seni urgan qo'l sinmaydimi, Xatcha?..

Xadicha yaqinroq keldi, erining usti-boshiga chaplangan loy va qonni artmoq bo'lib qo'l cho'zdi, ammo botinmadi, yovuqlikning o'zi mahobatli bir devor misol ko'z oldini to'sdi - qo'llarini tortdi, ko'ngliga yana qo'rquv oraladi.

Polvon hayratlandi: senga shunchalik ko'ngil qo'yib edimmi, Xatcha? Kel, qo'llarimda azod ko'taray seni, o'n besh kunlik o'lday quchog'imni to'ldir. Xatcha, meni qattiq-qattiq chimchila, zora seni tush ko'rmagan bo'lsam!..

U ayolni dast ko'tarib oddi. Xadichaning bilaklari bo'yniga chirmashgan zamon majoli qochdi, gandaraklab ketdi, lekin sal o'tib bilaklarning kuydirguvchi taftiga ko'nikdi, charchog'u og'riq unutildi, go'yo tani ham unut bo'ldiyu uning o'zi bo'yniga chirmashgan bilaklarga aylandi... Faqat yuraklarning ola-tasir urgani seziladi, go'yo butun dashtu dalalar ularning dupuriga to'lgan... Seni shunchalar sog'inib edimmi, Xatcha? Ko'ngildagi kinu g'azabim qani? Nega yig'laysan, Xatcha? Sen ham sog'indingmi? Sog'inganing rostmi, Xatcha? Biror narsa de, shubhalarig bekor de, Xatcha, ko'nglimni qabartma, belimni bukma, gavharni toshga urmaylik, Xatcha!..

Ayolning yuziga tikilib, gumoniga tasdiq izladi. Lekin Xadichaning turgan-bittani - yuzu ko'zi, bo'yniga chirmashgan bilaklari, yoqasiga qadalgan qator sadaf tugmalarigacha iffatga yor, shubhaga zomin edi.

Xadicha erining ko'zlarida bir og'riq ko'rdi, ammo so'z so'ylarga majoli yetmadi, bo'g'ziga tiqilgan achchiq xo'rsiniqni ichiga yutdiyu uning tarashadek qotgan jun chakmoniga betini burkadi...